

OMUKWETU

Oshifo shOngerki onkwaevangeli paLuther yomOwambokavango / Die Tydskrif van die Evangeliese Lutherse Ovambokavango Ker

No.23

DESEMBA

1966

LONGEKIDHILENI OMUWA ONDJILA

Mat.11:11-19

Johannes Omushashi sho a tu-mu aalongwa ye, okupula Jesus oye olye, Jesus okwa gandja eyamukulo limwe alike nolya tsa. Neyamukulo ndika olya kandula po omalimbililo agehe. Aaposi otaa Naamboka ye mu kundukidha oya li ya kwatwa wo komalimbililo noinaa vula okupikula nawa eyooloko pokati kaJesus naJohannes. Onke Jesus a tame-ke okufatulula Johannes oye olye, omushike nokwa zi peni. Oye okwe mu fatulula ngeyi: "Mu mboka ya valwa kaakiintu kaku nomunene e vule Johannes." Jesus a londeke Johannes puule nokaku na we ngoka a valwa kaakiintu te mu ihilile. Mu mboka taa si eso lyokolutu Johannes oye omunene. Oye ke shi owala omunene, ihe oye wo omuprofeti. Johan-

nes oye a ningi onzapo yokuhokolo-la oshilongo shaKalunga sho sha hedha popepi paantu, nomaantu muJesus Kristus. MuLuk. 16:16 otatu dhimbulula oye omunene. oshoka a ningi ongamba, nokuza pongamba ndjika evangeli otali uuvithwa notali hakanwa.

Moohapu ndhika otatu mono, nkene oohapu nomahunganeko ga popi Omukulili guuyuni ga tsakana, noohapu otadhi kala dha kola, sigo aluhe. Johannes oye a mono eha lya simana, oshoka oye a tetekele Omuhupithi guuyuni. Oye a thikama posheelo shEtestamendi Epe nokwa tala ye mwene eluwa sho tali tende, a tongolola Jesus e te mu ulike "Tala onzigonona .." Nando a pewa ngeyi esimano enene ine li ihalela, oye ngaa e

vulike kOmukwaniilwa gwomegulu Jesus Kristus ngoka a valwa mOmbepo. Okwa li ngaa a mono owino wa gwana wokunongela Omuhupithi nando omalyenge ge mu kala popepi. Owino mbuka owa koko noonkondo sho a tseye Omukulili gwe ote mu sile oshimpwiyu nomondolongo wo.

Egongalo lyaJesus Kristus, ndhindhilika, Omukwaniilwa gwoye ote ya, ino tonyala. Ethimbo ndika olyelago, ongoye wa pewa uulenga mbuka u hokolole Jesus, sho u lwete ethimbo olya thikana Omuwa ote ya mbala. Ota galuka. Okwe ku tetekelitha, ngoye ngoka wa fa wi idhina, ongoye naanaa Jesus e ku inekelele oshilonga shika u tetekele momagumbo momikunda koonkondo dhoohapu ndhika: Ehololo 22:16 oto kolekwa. Ye okwe ya.

Ihe uuyuni moka wa tumwa, ou nyenga. Johannes okwe ya itaa li, wo tau ti oku niwe koompwidhuli. Jesus okwe ya ta li, wo tau ti: Tala omufukedhi nonkolwe. Ihe olye gwomantu yaKalunga nogwomaatumwa ye a nyanyudha uuyuni, aawe, aluhe otau ngungutula, noitau zimine elaka lyOmukwaniilwa, aniwa omolwoye, inashi ku halutha, inashi ku tilitha. Nakuzimina ehala lyaKalunga oye ngaa omunene moshilongo shaKalunga. Ino ekelahi uunongo wuuka u toole uunongo waaukile. Oshoka ethimbo kali ko, Jesus ota galuka mbala. Kutha egongamwele lyoongenge mbali u ka kokolele Omuwa ondjila. Oshoka ethimbo tu li na efupi.

Ngoye ngoka to hilwa komangeneta guuyuni nokesimano lyawo, kala u shi shi oshilongo shaKalunga otashi hakanwa koofule, oshoka omahunganeko agehe oge nokutsakani-thwa. Jesus ota ti: Ngoka e nomakutsi nu uve ko. Ehupitho lye ya. Tu ningeni shamukata nakale po!



OMUNA GWADAVID OTE YA MEDHINA LYOMUWA

Hosiana, Hosiana, Hosiana, Hosiana.

Hosiana Jesus Kristus na hambelwe ngu, Omuna gwaDavid nguka, Te ya medhina lyOmuwa

Hosiana Jesus Kristus na hambelwe ngu, Omuna gwaDavid nguka, te ya medhina lyOmuwa.

- Hosiana mokombanda, Hosiana, Hosiana.

Omuna gwaDavid nguka te ya medhina lyOmuwa.

P. Shipena



OMUKWETU

Desemba 1966

OMUKENGELELI NOMUKENGELELIFI AVESHE KAVE NA ONHELE MOSHILONGO SHAKALUNGA

Otu na efano liwa. Judas okwa kengelela Jesus. Okwa futwa oimaliwa kovafalishai novanongo vomikanda. Ove mu ufana meholeko tava ti: Ngenge we tu kengelelele Jesus nde to mu kwata, ohatu ku futu oimaliwa ya tya ya tya. Ovafalishai tava lom-bwele nawa Judas: Lungama nawa nawa, ino monika nande. Ye Judas ta ti: Eewa ootatekulu, shaa mwa tala nge ohandi mu kwata. Omukengeleli oku dule omulodi. Oye omutikili ta tikile. Onhiko oyo oshiponga. Ondjila oyo tuu oyo Judas e i landula.

Ope na oshiponga. Okahalu koi-maliwa ka pangela Judas. Ouwa aushe waJesus e u dimbwa. A kwata Jesus nde a futwa. U shi oimaliwa oyo a futwa oye mu kwafa sha, nandenande. Osho e ke lipa oushima. Okwa ti: Woo, onda kengelela ohonde ihe na etimba. Oimaliwa okwe ke i kupula motembeli. Ye mwene okwe limangeleka nde ta topa. Okwa fya efyo lomukolokoshi.

Otwa koneka, aische tai ningwa nopefimbo letu, oya tongwa kOmbibeli. Oshikoko, ondeveli, otai longo hano neendelelo. Ou to lesa, lungama oshiponga nondjila yaJudas. Jesus te ku teeleele nomOkrisimesa yoneudo e ku shitulule nde e ku pe omwe-nyo.



Festus Ashipala muSuomi

EHOKOLOLO LYOSHIKETHATUMO SHAAPANGI 1966

Mpaka otapu holoka lwotango ehokololo lyoshikethatumo shaapangi. Oshikethatumo shika osha tamekwa kehiamo lyohole yoshilongatumo yi inyenge moomwenyo dhaapangi sho ya minikilwa kOmbepo yaKalunga okumona nokudhimbulula oluhepo lwaantu yaa noohapu dhaKalunga. Ombuto yotango ya kunwa moshiketha shika, oya kunwa mo eti-3/12/1964. Oya li ongalo yaapangi mOnandjokwe, ya tumwa okutota oshikethatumo shaapangi komusitagongalo gwomOnandjokwe, Festus Ashipala, oya li R7.70. Mbalambala iimaliwa iikwawo oya landulathana, nosho wo eindilo lyokwiindila omwevangeliste a longe oshilongatumo peha lyaapangi. Nolwahuguni-na omwevangeliste omutiyaali okwa indilwa ishewe.

Omumvo 1965, iimaliwa ya taambwa oya liR323. 38

Iimaliwa ya longithwa moondjambi dhaayevangeliste yaali:
Frans David ta longo kEkoka kuKongo R120. 00
Jonas Shikulya, ta longo kOmindamba R120. 00
Ya kwatha mokulanda ombako (E. Angula) R 32. 28
Kumwe..... R272. 28
Ya hupile 1965..... R 51. 10
Ayihe kumwe R323. 38

Oshiketha sha kala ngeyi 1966:

Oshihupe shomumvo 1965 R 51. 10
Ya taambwa 1/1 - 19/11/1966 R321. 42
Kumwe R372. 42

Ya longithwa moondjambi: Frans David R150. 00
Jonas Shikulya R150. 00
Kumwe..... R300. 00
Oshihupe shomumvo 1966 R 72. 42

Ayihe kumwe R372. 42

Nonando oondjambi dhaayevangeliste dha gwedhelwa na 50%, (R5. 00 komwedhi) onkene tuu oshikethatumo shaapangi osha hupitha oshihupe shivule shomumvo 1965. Omumvo tagu ya, oondjambi dhaayevangeliste mbaka yaali, otadhi ka pula R560. 00. Kalunga nayambeke ashihe shoka hamu shi ningi momagalikano nomiilonga yeni aapangi aaholike.

M. Ngipandulua.

OSHIWILO SHAKRISMESA

Okrisimesa oyo oshivilo shinene nohashi hafifa unene okudja ngaho komukulunhu fiyo okanona komukriste fiyo okomupaani. Ofye ohatu kumwa unene ngenge hatu mono omupaani ta hafele Okrisimesa nande ina mona ouyelele weendjovo daKalunga noku heshi kutya, Okrisimesa otashi ti shike.

Eshi ota shi tu dimbulukifa kutya, omunhu a tya ngaha meni laye omu na sha nande inashi holoka pouyelele shi dimbulukiwe kukeshe. Eshi ota shi ende kanini nakanini, fiyo nokuli ouyelele wa holoka kombanda. Fiyo omunhu ta dulu naanaa okudimbulukwa nawa kutya, edina olo Okrisimesa ota li ti okudalwa kOmukulili nOmukulili kutya, otashi ti shike.

Kombinga yoye ove ou wa mona ouyelele weendjovo daKalunga noto ifanwa omukriste, ou shi shi nawa kutya, oshitya Okrisimesa oshike.

Onghee paife ou li melilongekido linene okulilongekidila oshivilo sha tya ngaho nowe shi ninga nokuli. Elilongekido oli na eembinga mbali, ope na elilongekido lokolutu, olo unene hatu lalakanene pefimbo eli. Oshoyo ope na lokomwenyo eli ndi shi shi kutya, hava hapu hatu shi ningi nande, lo nee eli olo lotetetete komukriste keshe, opo taku landula lokolutu.

Omwenyo welilongekidila Okrisimesa, oo ouna elao. Omwene ne tu pe eenghono nomomudo ou, okuteelele edalo lOmona Ewifa laye.

L. Ndilimeke Shilumba.

OMHEPO INENE YA PEPA MU SUIDWES

Keembinga neembinga daSuidwes okwa dja eenghundana. Omhepo ya pepa noudjuu pomafimbo e lili noku lili. Peenhele dimwe oya teyaula nokufudaula po omiti. Peenhele dikwao oipeleki yeengulu oya finyuninwa pedu.

Okwa kala yo oupyu munene momafiku opexulilo laNovemba. Akushe muSuidwes ovanhu ova kumwa koupyu ou. Omu mOwambo nafye otu shi oku u tonga, osheshi owa denge pombanda. mOvenduka oupyu owa yelekwa wa londa pombada eendodo 96 pashiyelekifo F.

OKWA WA KONGERKI

Omushamane omutilyane Siegfried Grebien mOutjo, okwa dja mefyo omafiku aa. Okwa wa kongerki yaN. G. modolopa. Okwa li ta tula mo eengodi dolusheno, eshi pa diladilwa okweta ouyelele mongerki.

Okwa teka nga mokuulu lwokomhadi nde ota hakulwa paife mOvenduka. Omushamane ou oye omulongi womalulusheno moilonga yaMuni mOutjo.

A SI MOMEYA

Keetmanshoop. - Okanona okaluudhe koomvula hamano, oka si moshitopolwa shaBerseba kagwila momuthima.

Omuthima kau shi omule unene, ihe anuwa ogu na omakololo. Sho okanona ka kongwa mo, oka adhika ka si nale.

OHANDI KONGO OVAMWAMEME VELI MOUKWANYAMA

Ohandi indile ekwafo kunye amushe ovawambo, unene nye vomOukwanyama momaongalo nopeenhele adishe, epulo eli li shiivifwe:

Onda kanifa ovamwameme nde ove li ngeno mOukwanyama. Omadina avo oyaa: Ndeshiuda vo naNdeshipopi. Ina yavo oye Shimbala yaShidolo, e na omumwaina Kashiku. Oku na omona waye Shihepo yaMutala. Ame ou hai kongo ovanhu ovo, aame Tobias yaKaluuapa.

Ngenge omo ve li, elaka nali uye kuSamuel Shaanika, Oshimanya, eongalo Kuring-kuru Okavango.

Omushangi Shamuel Shaanika.

AAKAYILI YOOMBASIKELA MOSHIGAMBO



Aamati mboka ya sindana muudhano wethigathano lyoombaskela.

Shoka sha li mOshigambo mesiku 12/11/66, itashi umbwa nondhimbo. Aakayili ayehe aamati naakadhona konyala, ya gongalele peha limwe. Oya gongala postora yaA. Vilho, opo ya thigathane nokumatuka noombaskela.

Aamati mboka ya li ye na oombaskela dhawo yene pomake, oya li 47. Mboka yaa na oombaskela 22, kumwe 69. Mboka ye ya ashike kokatalekonawa inaa yalulwa.

Aakayili oya ningi oondalaye dha tsa noya kayile uule woomaila 3 1/2. Oya li taa kayile itaa tala konima nando. Okwa kala haku yi ooyatatu, ihe otsi oya li ya tsuma.

Aakayili mboka ya sindana muudhano mbuka, otaa monika mefano ndyoka. Kolumoho pevi otaku monika Jason Uusiku, ngoka a toto edhiladhilo lyuudhano mbuka, nokwa wilike uudhano. Omusamane Vilho okwa gandja sha, opo aasindani ya nyanyudhwe.

Edhiladhilo ndino ewanawa. Otali humitha komeho oshigwana miidhanomwa tayi pumbiwa meputuko. Ne pomukunda gweni omwa ningi shike? Nenge omwa lala owala?

J. Jason Uusiku.



Eluwa tali tende



Omufitaongalo Natanael Shirongo kOkavango. Neudo moshooongalelengerki okwa hoololwa oshilyo shE-pangelongerki.

OTWE YI TAAMBA NEPANDULO

Aamwameme amuhe aatshandi tamu longo mu C.D.M., iilonga yiikaha yeni otwe yi mono notwe yi taamba nepandulo enene oyo R4. 70.

Oshe tu ulukile kutya, nani omalutu ageke ga topoka, ihe oomwenyo noombepo odhili pamwe tadhi longo.

Iyaloo, iyaloo. Pamba nemu wilike, Nampongo e mu yambeke.

Sebulon Ekandjo.

EENDJOVO DOMBIBELI

Inamu hafela eshi eemhepo tadi dulika kunye, hafeni eshi omadina eni a nyolelwa meulu.

Ovanelao ovo ava tava koshola oikutu yavo mohonde yOdjoña. Paife ohatu talele moshilitalelo efano la dimimika, ndelene komesho ohatu ka tala koshipala noshipala.

Onghe liyandjela Omwene u mu lineekele, Oye ta yukifa ondjila yoye. S. Shiuaju.

OSHIKE TASHI KU LI

Omuwambo osho ha pula ngaha ou ta kuu onghuwo. Oha ti vali: "Eshi tashi ku li, nashi ku efe."

Ovanheleiwa ova kuwa onhuwo ileile va ti: Wuu, wuu, tu popileni. Tupopileni omolwetungo longerki yetu ipe yoipeleki. Ovashomeva ova tondoka onghuwo va ti: Osho tashi ku li nashi ku efe. Ove tu tumina R17. 571/2 lwaapo.

Ovashomeva meongalo laRyns, ohatu mu pandula eshi mwa tondoka onghuwo yetu. Kalunga ne mu yambeke nawa. Nye ovakwaneongalo lonheleiwa mu li mehalakano, inamu dimbwa etungo longerki yine oya pumbwa natango ekwafelo.

Josef Kondja Ngilifilua.

OUDI AKONI MONGERKI OO EYAKULO LINENE TALI PUMBIWA SHILI

Ongerki yetu otai mono neudo ovadiakoni vape va tekulilwa oshilonga eshi. Ovo ova hala okuyakula ovakwanaluhepo vopamwenyo, vopalutu, vopamhepo. Unene okuyakula ava ve li moluhepo la handuka shili nde itava mono ekwafo pamwe pelili. Ndi shi otu na oomeme, oomeekulu, omalai etu nomapongo etu mahapu a pumbwa eyakulo? Ovadiakoni ova hala va kwafe ngaha medina laJesus. Oshinima shipe shili nde otwa hafa unene ndi shi?

Elalakano lovadiakoni olo naanaa eli:

1) okupukulula ovakwaneongalo, ounona novanyasha, va longe oilonga yeyakulo lopakriste.

2) Okufila oshisho, opo aveshe va kale ve na omhito oku hanga eendjovo daKalunga, omasakramendi mayapuki nouhakumwenyo.

3) Okuyakula ava tava pumbwa ekwafo ngaashi ovanaudu voshiname- nena, ovakulupe, oilema, ovapofi, eembolo omalai, ovayanamhwengu, eengholwe, eenghwate, ava ve li meehombo di li pokuteka nokukwafa nokufila oshisho unene ava inava hala ile tava nyengwa okuholola oluhepo lavo.

4) Okufila oshisho ovanaudu noku va twala koihakulilo ngenge tashipumbiwa.

5) Okufila oshisho ovaendaendi naava vehe na omaumbo, okukumaida ava ve lipokupunduka nokuyambula ava va wila momapuko.

6) Okudiinina omatalelepo moihaikulilo nomeedolongo.

7) Okwoongela oimaliwa tai pumbiwa moilonga ei yokutota eengudu doilonga yomake nokuyakula moilonga i lili noi lili.

8) Okuyakula momalongelokalunga nokuwapeka ongerki.

Ovanhu ve na oshilonga shinene shi fike apa moshilongo shetu, tu va indilileni, Omwene Kalunga a kulike eyakulo lavo nde a denge po omaimbo aeshe.

OKUYA KIIPANGELO

Ngele to yi koshipangelo shilwe shaa shi shaandjeni, tango manga inoo thikama, ka tale ombapila yoye yegongalo koshinyanga shegongalo lyeni. Osho oshinima shotango komukriste.

Aawambo twa fa inatu simaneka ombapila yetu yuukriste. Muuyuni waanandunge ohaa dhiginine ombapila dhawo ngele dhuukriste nenge dhoshilongo, dhiipangelo nodho-

malweendo. Otse twa mono olwindji uupyakadhi mokuyakula aantu ya tya ngaaka taa ya miipangelo yaa na ombapila dhomagongalo. Ombapila yegongalo oyo onzapo yomukriste ya simana, inatu yi dhina, oyi vule dhilwe ndhoka ho ipyaidhile nadho. Oshike mbela muuyuni shi vule ehupitho lyomwenyo gwoye? Ileni tu shune kOmuwa tse tu aludhwe kuye, Hosea 6: 1-2.



Omusita Kristof Shuuja, na nekululye naanaa muSoomi

NDA LI DIHE SHII APA NDI LI

Onda uda kutya, onda fa nda ngwandjula sha. Onda li nda londa okambashikela ka manamo nde onda li ndihe shii apa ndi li. Onda li dihe shii sha nande, fiyo nda penduka ndi li monhele ndihe i shii. Ondi li peni mbela? Osho nde li pula. Ame mwene inandi dimbuluka eshi sha ningwa po. Eshi nde linyengifa okuulu kwa nge, ondi wete itai dulu okulinyenga. Mboli onda teka metundji. Opo nda koneka kutya, mboli onda wa kombashikela yange. Nda wa mbela nai pamukalo ndihe u shii. Ngehe u wete nda teka, hapa li olwaan-nyu ko.

Ondi udite nouyahame mokwooko. Mboli ondafonghoka yo mokwooko. Opo nda hovela okudimbuluka oinima ihapu. Nani onda li nda kolwa Nani oukolwe otai imbi nge yo ndi londe ombashikela yange.

Onda dimbuluka yo eendjovo nde di lombwelwa kumeme. Meme okwa tile: Mumwange, oungungumana tuu. Ino endaenda unene moyeendo yeeshipota. Fiku limwe oto kafila dahamungheya.

Ovahakuli ova lombwela nge kutya, ondi na okukala shiimba odula netata moshihakulilo, pefimbo olo onda tulwa nale moshamaende. Moshipangelo onda kalamo nda nangala ashike ongali. Okupiluka itandi shi dulu. Otwa kala hatu ningilwa oandaha. Mongulu yetu omwa li yo, okashikopa ke na omambo. Onda kala yo handi lesa mo yo, handi leshele ongali. Opo momutima wange mwa tendelwa keluwa loupe washa.

Onda shiika eendjila dange, aperse apa nda li handi tondoka nombashikela yange. Okushidiladila ohoni yongaho. Meme oye a kalela nge moshihakulilo. Luhapu a tya: Ndi shi owa li wa dina eendjovo dange, u wete ko nee?

Ehokololo eli la hala oku ku lombwela ove ou to lesa kutya, lungama lelalela. Shi li ko osha hamushila wakavandje. (Elundululo.)

Paulus Muetako, Omaruru, ota ti: Eendjovo dOmwene onda ti: Indileni nde tamu pewa, kongeni nde tamu mono, kongholeni nde tamu yeululwa. Otu li ngahelipi neudo? Ponehele yasho ohatu indile oinima ilili. Ohatu kongo oinima ilili itai tungu, ohatu konghola poivelo yomapuko, omivelo domapuko, omivelo dounyuni. Ove oho konghola peni?

TWA MONO OOMBILIVE DHENYANYU



Aune Shilongo

Epangelongerki la fimana,

Ohandi hambelele tate Kalunga omolwomaendifo aye manene. Omudo aushe okukala muJärvenpää okwa talifa nge elongonghono laye, fiyo okefiku eti-24.9, omo twa longekidilwa notwa yapulilwa ouwiliki wovanyasha.

Ohandi pandula unene ovalongi ovafimanekwa vomuJärvenpää. Ovo ova humbata nge noukaume nelididimiko, nande omaunyengwi okwa li po mahapu. Ovanaskola vakwetu novashiinda ovaholike navo yo ohandi va hambelelele Omwene e va wedeleko natango keenghono nohole, oyo ve i manena mokukwafa nge. Kalunga na hambelelewe yo omolwoona-

OTATU MU PANDULA

Otatu mu pandula amuhe, one aagundjuka 12 yegongalo lyetu Ogongo, mwa kala muWalvis Bay. Oshoka omwa dhimbulukwa okukoleka oshiketha sheni shaagundjuka megongalo lyeni. Iimaliwa R6.70 mbyoka mwa tumu oya thika nawa.

Egongalo otali pandula wo omukwanegongalo gwalyo Junias Angala muTsumeb, sho kwa koleke oshikethagongalo na R10. Megongalo lyOgongo otwe mu pandula nokuhakela omake ongo tu mu lwete. Kalunga ita dhimbwa iilonga yeni nohole yeni, sho tamu simanekitha edhina lye. Lesheni Hebr. 6:10 nOndjalulahokololo ontiali 15:7.

Peha lyegongalo Naftali Amadhila.

Aune Shilongo muFinland nosho wo Amaambo muAmerika, oya nyolele Epangelongerki oombilive dhpandulo nomayambeko gaKalurga nomayakulo gohole ya dhimbululwa momavi ngeyaka. Oombilive dhawo otadhilandula mpaka.



Eino Amaambo

ku tu ilikanena.

Otwa li tu na oshivilo shi naeyambeko. Ookaume vahapu oko vali vopopepi nokokule, ngaashi meckulu Hilma Ranttila nookaume vokongulu yetumo.

Eshi twa xulifa oshivilo shetu muJärvenpää, otwa twikila kongulu yetumo. Meme Vuokko e tu kwatela komesho.

Mefiku eti-29.9 onda tameka o-skola yoilonga yomake muRiihimäki. Otai kala fiyo muDesemba meti-22. Nande oilonga oi li po ihapu ondi na omukumo ou. "Aishe ohandi i dulumu ou ta koleke nge."

Weni,

Aune Shilongo.

ONHINDO OHAI ETA OSHIPONGA

Aveshe hava ende kohuuna, otava konene nghe tava tuwa komkiaya nde hava hovele okulishokola. Okaana keshe kena nawa omayeke nge ka tuwa kekiya, oha ka kwena. Ina ote uya nde te ka kufa oshosholo.

Ovakulunhu ohatu longifa eemba-le, eenhisho, eeshipela neenghumbo neenghwato, tu lidone oshiponga. Nande napa dje ohonde, ekiya oli na okukufwa mo. Mwene nge a nyengwa, ota ifana kaume kaye e mu shokole. Ngenge omakiya taa dimo, nena onhindo itai kala po. Ou e liefele o

Tatekulu Auala,

Nda thiki. Omuwa okwe enditha nawa. Aakuluntu yoskola oya taamba ndje nawa. Inashi yela naanaa kutya, otandi ilongo iilongwa yini nosigo openi ihe otandi inekele otashi ka yela ngaa nawa komeho, ngele sha yele otandi mu lombwele ngaa.

Kombinga yolweendo lwandje, osha ende ngaa kutya, ondhila oya eta ndje owala sigo muNew York na okuza muNew York onda futu ekambamba oondola 36.00 nonde ende omutenya gumwe nuusiku umwe.

Onde ende nelago ngaaka kutya, pethimbo ndyoka nda thiki onda adha pu na aalongwa yamwe ye li po taa ilongo oshigreka, na ohaa ningi ngaaka kutya, aalongwa ape aayehe oye na okukonakonwa ngele otaa vulu tu okulundulula muNovum. Onda kala mootundi iiwike itatu, otwa konakonwa na onda piti ngaa. Ngashingeyi otandi ilongo okupopya nawa, opo ndaa ka kale ndi na uudhigu owindji ootundi ngele tadhi ka tameka.

Omusamane A. Burgess ngoka ta sile ndje oshimpwiyu, okwa tumine ndje kofalama yimwe nopopepi opu na ongerki yaanaafalama, opo ndi ilonge iinima yi ili noyi ili, unene okukalamwenyo (farming life of Americans). Onda li paanafalama aakriste aanambili. Otaa ithana ndje ndi ya talele po momagumbo gawo.

Nomakundo gombili.

E. Amaambo.

nhindo, ota ka ninga oshitiningili.

Ngashi tu na okwaamena omalutu etu koiponga, oshoyo tu na okwaamena eemwenyo detu. Ngenge twe litwa keemwenyo komakiya, tu yeni komuhepaululifitate tu shokolwe. Oshike tashi ku imbi ko, ove ho kongo omushokoli wekiya? Oshike wa tila onhindo, ove ino tila omatimba? Ekiya lolunde momwenyo womunhu, oKalunga aeke ha dulu oku li dona mo.

Ifana hano omushokoli fimbo kuyele nofimbo ekiya inali velukila mo. Ekiya olo oulunde nomushokoli te ku kufa omatimba oye Jesus Kristus. Ohonde yaye otai dimi po etimba lakeshe ou te lidilulula.

Urais Nghidinihamba.

KALUNGA ATALA UULUNDE KEVI NOKWA TUMINA KO OMWANA.

LIDILULULENI, OU-HAMBA WEULU OWA EHENA POPEPI

Eudifo laJohannes Omushashi o-lipe nonena kufye. Ota ingidile ova-wambo novaSuidwes aveshe nopondje elaka linyenye tali ti:

“Lidilululeni, osheshi oshilongo sheulu osha ehena popepi. Longikidi- leni Omwene ondjila, yeleanifeni ee- ndjila daye. Omalufilu naa fufilwe. Eendudu nomitunda nadi filukifwe. Omamhana nomangolyo naa yukifwe nde oifilukutumba aishe nai palwe nawa. Osheshi ombelela aishe otai mono exupifo laKalunga. Inamu kala mwa fa oludalo lomauta, ndelene imikeni oyimati yelidilululo.”

Meudifo laJohannes Omushashi ohatu longwa vali ngaha: “Ou e na eehema mbali, na pe ou ehe na sha. Ou e kwete oikulya, naye osho na ninge. Inamu futifa oyo inamu i lomwelwa. Inamu fininika ovanhu nde inamu va nyeka, waneni nondjabi yeni.”

Johannes Omushashi okwa lom- bwela vali ovanhu ngaha: “Ame ohandi mu shashe nomeva ashike. Ndelene otaku di ou e dule nge ee- nghono. Ame inandi wana nokuli okuditula oumwiya veenghaku daye. Oye te mu shashe nOmhepo Iyapuki nomundilo.”

“Oye Jesus te uya noshimbale shaye.meke nde ota yele oilya ngaashi hai yelwa moshipale. Oilya ote i tu- vikile mokaanda kaye, ndele etutu, olungu, ote li xwike momundilo”.

L.M.Sh.

KALUNGA IHA NYENGWA KU SHA

Egongalo lyOkankolo olya kala ethimbo momalimbililo, tali ti walye- wo ngele tali mono omusita gwalyo kee shi omuyakuli. Oyi ipulapula sha ti sha ti.

Esiku eti 9/10/66 ethimbo lyongu- la, lya li osondaha naantu ya tegela ongendjo yi tone, okwa uvika kwa ti: Mbolokoto. Nani oshihauto. Tu ka tye tuu ngeyi, iipala oyootatekulu T. Shipanga, M. Ngipandulua, ya eta omusitagongalo omupe omusamane Johannes Nantinda, ita yakula ihe omusita ta lele egongalo lyOkankolo. Meme gwe otwe mu mono notwa tseya, nani oye ya shili.



Jesus ota konghola poshivelo shomwenyo woye a hala oku ya mo. Oto Mu yeulula tuu?

OHAMBA YOYE OTAI U YA KWOVE

Tala Ohamba yoye tai ya kwoove mwenyo wange.

Tya: Onde ku yeulula, mwame ila Hamba yange.

Nghenda yoye eta mo, shange ashishe, oshoye ne.

Muame oukulu komba mo, kufa mo ashishe shange.

Shoye mwene eta mo, dika eumbo meni lange

Mutima wange koshola, onohonde yoye iwa.

MEhang. 9:1,3.

Ongendjo sho ya hititha, ongerki yu udha naantu ya kala nokataleko- nawa. T. Shipanga naNgipandulua oya langeke tate Nantinda megongalo lyOkankolo negongalo olya taamba nenyanyu omusita gwalyo. Omusita omupe a ningi elongelokalunga neu- vitho. Otwa popithwa wo kaayenda mbaka noye tu paathanitha nomatu- mbulo gomukumo gopahapu dhaKa- lungu.

Otwa pandula aasita ye tu yakula nale megongalo ndika. Twa pandula wo tate A. Amukugo, sho kwe tu yakula oomwedhi ndatu. Otse naa- mwameme atuhe, otatu hambelele Omuwa, ngoka iha nyengwa kusha.

Peha lyegongalo,
Vaino Nepembe.

A XULIFA

Omaruru. – Omushamane K. F. Höflch omundowishi, a kala nale mO- maruru, okwa fya omafiku aa mu- Duitsland.

Höflich okwa kala nale muSuid- wes nde ovo votete omu. Oye owo- ngerki yovandowishi muSuidwes. Ee- ngedjo oda dengwa efimbo lominute 10, omolwedimbulukofimaneko.

TASHI KU LI NASHI KWEETHE

Etumbulo ndika olyo hali zi mo- makana gaatondoki yonkugo. “Shoka tashi ku li nashi kweethe.” Omukugi ngele ta uuvu ngaka, ota kala a nya- nyukwa, oshoka aakwathi ye ya.

One mboka mwa uuvu onkugo nomwa matuka: Iyaloo! Iyaloo! Tan- gi! MuMai puElim opwa holokele oshiponga, egumbo lyegongalo lya pya komulilo gombaadhilila.

Otwa li twa kumwa nokwiipula: ekwatho otali tu zile peni? Osho twi ipula. Kalunga a yamukula oonku- mwe dhetu. Omakwatho ga zi mOmundaungilo,

Ohalushu,
Oluakana,
Grootfontein,
Oomina noomina,
Oniimwandi,
nOniipa.

Twa pewa imaliwa ayihe kumwe: R20.50.

Tatu pandula wo mboka ye tu pe omihongo keyego. Tangi unene. Kalunga ne mu yambeke amuhe ye na indjipalithe iiniwe yeni. Uutalala nomvula ndjoka ya li yi noku tu lya, itayi tu matha we. Otwa holama, tu li momuzile mongulu.

Ookaapanda
Elim.

EPANDULO

Aakriste aakwetu yomegongalo lyaWalvisbaai, otwa taamba nepandu- lo oshipakete shiizalwa mwe yi go- ngelele aayeleele yomuuzilo wOndonga. Shika osha holola nkene tamu longo pamwe natse, nando mu li kokule. Inamu vulwa okulonga uwanawa “o- shoka Kalunga kee shi omugoyokithi, a dhimbwe andola iilonga yeni no- hole yeni nokusimanekitha edhina lye” (Hebr.6:10). Ekwatho lyeni nokulo- nga kweni pamwe natse moshilonga shOmuwa otwe li pumbwa.

T. Shipanga.

OUNYUNI OTAU TONGO SHIKE

OVETA YEENDJILA NOMALWEENDO

Oveta yeendjila oya yandjwa nokuli omafiku a dja ko. Eendjila dovene tadi konakonwa, ku talike nge nge di li tuu nawa. Osho yo oyeendifo otai konakonwa yo, ku talike nge nge oi li tuu nawa. Okwa popiwa nale kutya, oiponga nomafyo haa holo loka moihauto, momashina nomeedila, ohai di opo eshi pe na omapuko ngee meendjila, ile momahooli pamwe ile moitenda yoyeendeleli yovene.

Onawa u endelele u kongele oshihauto shoye eembiliki, omundilo, ohutela noinima hai pumbiwa, opo u ha hangwe konyakanyaka. Vati kombinga ei ya ama kOwambo ekonakono loihauto otali ningwa fimbo inatu fika muJanuali wodula tai uya.

OVATUKIMHEPO VA ALUKA KONIMA YOMAFIKU ANE

Kaap Kennedy. - Ovatukidila Gemini XII ovaamerika vavali, James Lovell naEdwin Aldrin, ova alukila nawa kedu. Mokwaaluka omadila avo okwa wila mefuta Atlanta. Opo edila limwe ole va yaulamo diva nde tali va twala keumbo.

Omumenhu Aldrin okwa faneka omafano fimbo va li tava ende momhepo. Okwa holola ngaha kutya, oilonga otai dulu yo okulongwa kwinya momhepo.

Ovamenhu ava ova tuka momhepo omafiku ane, nde ova dingilila edu lwomilongo 59. Ova tuka ngaha emaila didule omiliona 1.6. Eefikola odo hadi eta omaunghulungu. Ngeno otu di mone da wana, ngeno oto tale omanghete.

OUHANANA VA DALWA VE LI KUMWE

Moshihakulilo shomuKaapstad omwa dalwa epasha lounona vavali. Ovalaule nde ova dalwa va kanyatela kumwe.

Ounona medimo laina ova tandwa mo. Etando ola ningwa mominute 50, nde ova hangwa va kanyatela kumwe okudja keenyala davo fiyo okeenhulo.

Omupopi nghundana woshipangelo Rooi Kruis shomuKaapstad omo va tandelwa, okwa ti kutya, onunona otau te nawa. Otava nyamu kevele longumi.

YAALI YA SI

Aambantu yaali, omadhina gawo inaaga tumbulwa, oya si omasiku ngaka moshiponga shoshihauto. Oshihauto moka ya li ya londa osha sitamba moshikwawo. Shika sha ningwa poomaila ando hamano okuza kOkaukuejo.

Oshihauto oshi idhenge anuwa moshomutonateli gwiinamwenyo pOkaukuejo, omusamane Potgieter. Anuwa opwa li ontsi ya tsuma.

VAMWE VEHOLAFANE OVE LIXWIKWA

Omaruru. - Ovanyasha vavali olaule, va li va hala va hambolafane ndele ooina noohe inave shi hala, avesho vavali ove liunda omahooli nde tava litomeke nomundilo momafiku aa.

Ovalaule ava va hangwa popepi, ova endelela nde tava dimi omundilo. Paife otava hakulwa moshihakulilo, shaashi omundilo ihau kwata shimbo do.

Omulaule umwe vali a li te lidi-paa ye mwene molwoinima ihe na omutwe nefina, mbela ouyahame owe mu kwata nde ina fya. Eshi a pulwa okwa ti: Ame onda hafa eshi inandi fya vali.

Oshoongalele shovakulukadi mOtjimbingwe

Oshoongalele shovakulukadi vovaevangelifi novafitaongalo vomelongelokumwe ova ongala mOtjimbingwe 14-20. 11. 1966.

Ovakulukadi vovaevangelifi melongelokumwe mOushimba, ova ongalele mOtjimbingwe omafiku aa. Oshoongalele osha li shi wa, nosha wedelwa omukumo moshilonga ve shi ifanewa okuyakula oshiunda shOmwenemelongelokumwe mOushimba.

Ova longwa oilongwa yopamaludi aa: Ongudu yeilikano, ofikola yoshondaha, olwiimbo, eetundimbimbeli, onghalafano yomeumbo, Afrikaans, oukalinawa nouteku wokaana.

Ovo vali va mono omhito ei yokufika kOtjimbingwe ova dile keembinga neembinga.

Oshoongalele eshi oshitivali, shotete osha ongalele muSwakopmund, muApilili 1963.

Twa hambelala Tate Kalunga omolu ouwa ou e tu ningila. Twa pandula ovaneumbo mOtjimbingwe omolu oshisho noukaume wavo kufye muwa.

Metusalem Shilongo.

EPANDULO

Ofye Ovandobe otu na epandulo linene kovamati hava longo mOushimba kuC.D.M. nokOvenduka.

Ova umba ongalo omoloipundi yongerki yetu eshi, twe va shivifila kutya, otwa pumbwa oipundi yongerki.

Ovamati kuUbvley Hostel C.
D.M. R20. 80c
,, Local ,, R18. 10c
,, Windhoek R16. 90c
Kumwe R55. 80c

Hano ovakwetu aya mwe tu kwafa ohatu mu halele epuniko laKalunga moilonga yeni aishe mu wedelweko eenghono dipe.

Ovamati vamwe va umba ongalo ei ovOngerki aishe. Ovauninginino, mOndonga, kuAngola nOvakwanyama nee, va haaveshe ovakwvangeli, vamwe ovakatolika. Iyaloo vakwetu ee! Kaume koye iha monika ta dalwa. Oimaliwa ei aishe ohatu ke i longifa ashike moipundi mokulanda oipilangi oyo tai ka pangelwa oipundi.

F. Shikomba,
Ponhele yeongalo.

ONGUEDIVA OYO TSUU

Otayi ti pii-pii mOwambo mokudhana etanga. Osipana yaKatana oya li ya tokola yi ye yi dhane etanga naa ndji yaNgediva. Ano yaKatana oya sindwa nookoola 2-1. Opo ishewe Okatana ki ithana wo Onguediva kuyo noka gandja wo ookoola 2-1, ya fa owala yiishuna ko.


Hoerskool-Oshigambo nayo oya li ya hala okutala sho uunona waNgediva haya dhana. Nayo oya nya-nyelemo wo 1-0. Kakele kaaDimbomba yi idhengele mela lyondjila ye ye yi italeleko yoyene. Mbaka oya yakulwa nookoola 4-0 noya shuna nontilo ya li nomiipala.

Aanguediva ohaya dhana ngaa yotaa mwena po. Shimwe ashike ihaa ethele omeya mondunda.

AaNiimwandi nayo wo ya kundana oshinima shika. Nehalo enene ye ke ya. Oya li aalumentu yiipapa yomalutu. Aalumentu mba haku tiwa aaLange. Oya li ya homata tuu shili noya pya ondjungu.

Taa, uunona waNgediva nango-ye mbo. Osho nduno ya yi mokapale. Ngiika ya ka langulwa etaa nyanyagulwa nookoola 9-1. Osho aanaskola aaNgediva ya mono edhina moku-dhana kwayo kwatya ngaaka.

Koshaalo Bileam Akaye.



Omwene gwomukunda wOnayena, moka mwa tungwa oshipangelo oshipe, okwa nyanyukilwa wo oshilonga shetungo. Okwa gandja nookuli ongombe kaatungi omagano, opo aonetungo ya lye onyama. Omusamane Martin Mbulu okwa fanekelwa petungo epe pamwe naantu ye. Oye uvite, oshipangelo oshipe otashi ke ya kwatha.



Etungo ndika olyoshipangelo oshipe shOnayena mOndonga.

OSHIPONGA SHOMU- LILO ETI- 17.11.66

Omulilo ogwa hunuka aalumentu aalukonda taa kumbulula ongulu yotango yosikola yakuku Martin Rautanen. Omulilo ogwa geye noonkondo sigo gwa kwata egumbo lyakuku Martin Rautanen lyotango, etagu nuka etagu kwata ondjugo yomatemba. O, ii-huna shili. Oondjugo adhihe dha tumbulwa odha lunguna po thilu.

Ihe nando ongeyi otwa hambelele unene Kalunga, sho inaamu pila nando omuntu, nongaashi wo ongulu dhilwe odha hupu naanaa, nando odha li dha gwana okupya, oshoka odha li popepi.

Egamenno lyaKalunga otwe li tala olyo enene nokali shi nando okutumbulwa. Onkee tatu ti owala: Otatu hambelele edhina lye muudhigu wetu nomiiyonga yetu, oshoka oye e li putse note tu gamene.

Johannes Gueendama.

AALESHI TAA NJOLA

Tomas Kahima, ota hambelele Kalunga, oye sho a hupithwa moshiponga sheso. Ota hokolola ngeyi: Esiku eti-21/4/66 otwa li twa londa ombakumbaku. Okuza pOndjondjo nokuthika pomukunda Onamulunga, oshimbakumbaku sha kandoma. Mukwetu oye ta hingi, ngame nda londa konima. Ngame nda gwilwa kusho nonda teka okwaako. Onda ya moshipangelo mO-nandjokwe. Osho nda kanitha nookuli okwaako kwandje moshiponga shiyaka.

Onda kwathwa nuwehame wa hulu po. Onda hala okupandula aapangi ne mwa panga ndje, Omuwa ne mu yambeke. Otandi pandula wo ookuume oyendji ya kwatha ndje methimbo lyokulala mombete. Yamwe ya pe ndje iimaliwa, iikulya nosho tuu noyakwawo ya galikanene ndje. Omukulili gwandje otandi mu pandula wo sho a hupitha omwenyo gwandje. Onda hala a hupithe ndje wo esiku lyahugunina. Oye na hambelelwe.

Daniel Iimalua, Elim, ota popitha ayehe ye noshilonga shokupanga oomwenyo dhaantu. "Inatu tileni aantu ngele taye tu haagula. Ngele taye tu sheke nenge taye tu tidhagana. Ino iteeka omumwanyoko. Uumbanda inau za mohole yoshili. Ohole yaamwameme ya hwamekwa nenyanyu kOmbepo Ondjapuki, itayi tala uu-kwatya waantu, ihe otayi longo nenyanyu negundjilo sigo Omuwa ta galuka.

P.D. Mhata, Oranjemund, ota ti: Onda didilika onyuni kau na mbili. Kokule nopopepi nomedu letu otapa udika omapiyaano. Nale inatu kala ngaha. Tu indilileni edu letu. Tu lituleni meke laKalunga, oye mwene e tu pe eshi e tu halela. Tu indilileni yo onyuni u mone ombili.

Otwa lombwelwa nale kutya, otamu ka mona omamoniko omalwoodi nomakolokoto. Osho yo omahongololo okwa popiwa nale. Mokwiindila tu kaleni yo twa kotoka nde tu li mOmwene.

T.P. Nakaluudhe, Oshigambo, ota kumagidha aagundjuka ooyakwawo ta ti: Aakwetu tu zeni mo momagumbo tu ye kiigongi yetu. Hu wu ukitha oshipala ngashingeyi, shi galula ko u kale nando okamunute kamwe poohapu dhOmuwa. Inatu shekeni aalongi yetu, tse inatu ninga oshityani.